



文直行書

詩部卷之五

明宮保尚書壇石熊先生筆

男人霖伯甘編

七言古一

壯士歌

杜陵男子搏雙拳短衣窮袴窄褊緣腰下離弓不  
解弦晝逐狐兔夜擊鮮家無擔石四壁穿止有七  
尺豪曹掛竹椽博塞場中偶流連空手一擲百萬  
還傾囊半償鑪頭負醉倒平康抱甕眠明珠翠羽

飾寶鈿妓女誼挈金牕煙十萬買得桃花馬十萬  
裝成軟玉鞭十萬紫遊繡羅鞵牀頭恰剩二十萬  
盡數斥作賻喪錢明朝依舊室如懸輕俠聲名四  
境傳公子王孫爭識面窮巷車騎日駢填王孫致  
鯖五侯具公子供張客三千珠履滿堂虛左邊直  
坐上坐驚四筵避席致辭主人前何以報德無食  
言君家有急我生捐君不見朱亥乃侯嬴之忘年  
十萬軍中一椎奮大梁霸今邯鄲全我若功成長  
揖去分毫不受主人憐但求生不愧郭翁伯死可  
見原巨先賣漿屠狗益蕭然高陽隊裏逐酒仙任  
君推盡綿上田

定海歌爲沈將軍作

海水洪濛搖地軸海日朝擎開大陸固有羣仙騎  
赤驪亦有白龍困魚服無諸城裏高樓臺賈舶蠻  
舩競追逐紫貝珊瑚海底沉長安市上家家鬻君  
不見三千童女入扶桑鞭山走石秦始皇又不見  
漢家帝子開滄海樓船將軍下豫章吁嗟乎海水  
本定人難量茫茫愛河翻識浪英雄一怒鯤鵬飛

盜賊亦作鯨鯢樣吾今爲歌定海歌斷鰲之足海  
無波與君醉飲金叵羅泰山四維高峩峩

渡湘行

冊封渡長沙江大風因弔屈賈作此

湘江漭蕩湘山嵬猛風吹天聲若雷中流沙嶼插  
江隈激浪成花洗蒼苔途長病渴思酒罍頻呼舟  
子莫徘徊舟子致辭謾相催解艦乘風似飛埃果  
然倏登江上臺吁嗟乎此湘水至無情哉專使忠  
臣義士心肝摧三閭大夫何偉傀一汨羅源空溯  
洄驚得魚龍夜夜哀况復扼抑賈生才治安之策

等寒灰徒令甲古之人腸一日而九迴吁嗟乎安  
得秦皇驅石來填平湘水只一杯千秋萬古愁雲  
開

渡河行

丙辰七月以冊封之後渡河

昔年幾渡彭城河城高岸夾河無多今年捧節渡  
滎澤秋水新漲孟諸波波頭立起如鰲山疑是鰲  
足斷波間蛟蜃混濁青天氣斥散鷗鳧羽翼翾快  
得東風吹逆浪船頭不隳下流灣又悵風狂逆浪  
吹柁師眼瞬敢差池舟中全藉檣帆滿檣檝蘭篙

了不施滔滔湧動銀潢瀉呬喋縱橫變化奇奇觀  
 變化雲盪胸水府馮夷咫尺逢張嗉直欲平吞盡  
 擬學琴高騎赤龍龍似蠅蜒心有主扶搖海運自  
 從容噫嘻乎危哉快哉人道黃河天上來渾沌龍  
 門孰敢開神禹夫非盡人子鑿通地柱砥瀾迴萬  
 古東流若吼雷固知經世需大才何事坳堂  
 杯

明河篇

西風吹霧白河明細細光星雙玉清織女弄杼不

飛藻空向牽牛度五更露花夜濕衣上月淚滴相  
 思殘紅雪微茫海烟城頭起蜿蜿羣鳥疊秋水山  
 鷄亂啼日欲曨年年秋水埋秋空安得火雲焰流  
 宇架作河橋飲赤虹

俠客行

延陵壯士氣如虹銀鞍白馬追西風意氣許爲知  
 已用血縷吳鉤霜雪蒙要離冢上蛇含草飲飛廟  
 下隼擊空持圖慣上秦王殿殺人向萬軍中荆  
 卿死朱亥生男兒名字總崢嶸邯鄲城裏千金却

三齊軾下五鼎烹事了身名毛羽輕英雄何必纓  
胡纓吳楚軍中誰姓劇亞夫得之爲上客君卿遍  
遊五侯門千乘送喪皆衣白悲哉巨先與翁伯睚  
眦殺人竟何益大原臨淮守繩尺西道南陽祗盜  
踰終不如賈人弦高犒師策道路一言存君國

以上綠雪樓敲草

從軍行

擬漢事

君不見紅塵走馬搗金鞭報道休屠入酒泉鴈門  
太守親持戟都護軍書十道傳回內虎符連夜下

六郡三河發兵馬馬在秦涼新課騎兵是孤兒難  
戰野亭長三老不容情沿門呼促眼猙獰寡婦遍  
覓無壯丁願備晨炊誰應承榆葉疎黃秋氣早關  
門一片黃蘆草由來烏合不成軍結隊反戈掠官  
道沙場鐵鼓響鏗鏗登陴望救急如風十萬殤魂  
還未冷誰爲祈父豈不聰安得壯士一登壇橫磨  
短劍夜霜寒紅旗半捲錦文鞍三千私客雄雞冠  
西度龍堆東白檀辭君直去定樓蘭盡逐谷蠡與  
呼韓匣裏刀光濕不乾陰山千里氣漫漫捷音飛

奏九重歡不願黃金與高官但願君王帶笑看從  
來英雄一怒天下安心血如虹照日丹

邊地苦寒行

秋天八月高飛雪都護貂裘冷如鐵可憐戰士着  
鐵衣十指龜文渾欲裂裂指粟膚卧草鼻曉起戟  
鬢斧冰噉風緊紅旗凍不翻角弓折斷絲弦絕愁  
煙黯淡殺氣慘耳聽吹笳聲哽咽幸屬漢家飛將  
軍肯與吏卒同饑渴椎牛灑酒犒轅門逐捕獬羊  
飲狐血箭落黃雲刀劈霜猛氣紛紛汗流熱論最  
幕府秉至公春滿龍荒照明月

銅雀妓

君不見鄆水東流太行下金銀氣識西陵夜青松  
歷落鳴珮環宿草依稀蘊蘭麝二喬未鎖江南春  
三馬已奪雲龍駕月明星稀烏鵲飛英雄色相餘  
臺榭疑冢空懷千歲憂分香賣履何時暇只今人  
耕沙岸墳烟火猶疑歌舞罷

其二

朱光欲頽漢家社黃星高照魏都野赤羽金戈氣

似虹翠管銀箏吹合雅寶釵雜墮錦璣璣蠟鳳光  
銜瑠玉笋臺高雲雨並巫山群婢謔浪聲咿啞虎  
視眈眈畏卧龍狼顧忽忽忘司馬至今曹馬並銷  
沉富貴奔駒真亦假君不見鄴下荒煙起白楊春  
雨犁翻銅雀瓦

霹靂引

康衢歌牛尾舞希聲太音古南風愠解五弦和千  
秋萬世開琴譜姜里操文王臨河歎孔父師曠清  
角風雨怒太古之音音漸微新聲靡靡羽聲悲濫

觴末世更凄緊大雅淪亾曲堪哂繁絃急節且停  
徽聽我琴彈霹靂引君不見巍巍乎浩浩乎崑崙  
劈斷中條分泰山千仞黃河奔龍門激浪飛黑雲  
崇朝天下雨紛紛豐隆奮椎響殷殷陰陽噴薄氣  
氤氳宮聲一動天下春如從鉅鹿破秦軍百萬呼  
聲捲地聞又如昆陽大戰豺虎羣瓦屋震破新都  
焚直使黃河倒流泰山徙洞越朱絃尚鏗爾嗚呼  
世無鍾期琴胡爲誰識高山與流水

楊白花



長安三月春似霞五陵年少鬪繁華金鞭嘶去碧  
雲合日暮城西欵狹邪十五女兒當壚早筵前解  
唱楊白花白花濛濛落如繭深院芊茸點青蘚鴉  
翎薄鬢兩邊堆荷葉新裙曳地捲千門萬戶起東  
風雪裡攆毬純素軟軟裁純素作流蘓沉香璧帶  
椒泥塗珠簾鈎放芳塵杜嫋娜猶自入金鋪昭陽  
殿下澁澁燕雙雙飛舞月模糊模糊春月照春蘿  
綠雲紅雨事無多桃李有情秋結果栢梧成蔭夏  
低柯那似堦前此日香綿落盡入銀塘逐逝波

太姥歌

君不見東甌之西西甌東高山大壑瑣烟虹我嘗  
振衣千仞上灑氣出入搖鴻濛浙江潮起赤城曙  
岱嶽嵐飛滄海空河庭紫貝鮫綃窟瑤臺金闕蘂  
珠宮龍精噴雨松崖黑颶母騰光石島紅春湖十  
里青菱角秋塘萬片錦芙蓉花落綠潭蹊窈窕鳥  
啼紅樹徑蒙茸從新石罅開天敞自古雲標亘地  
雄晃煇平吞杓斗下鞬閉幽玄尺夔通一線光明  
溜乳竇三垣氣象卓螺峰結構擬絕神明巧漢殿

秦房總未工我愛此山難屢至猶如雪上印飛鴻  
且爲署題鴻雪館武陵春水學仙踪嗚乎閩海無  
鴻亦少雪太姥萬古高巖嶸精氣凝成無毀滅與  
君分疏如何說但將空色無分別須彌打碎作丘  
垤翻乾海水撈明月

支提歌

君不見支提山白雲纍錦海之間霍林兩童高人  
窠九十九峯朝赤帝金垂渡口桃花班桃花迷路  
山崩劣陰霾古樹崖洞黑黃茅綠荔翳荒壇鶴觀

蒼封丹鼎及鼎及丹成瀉玉泉鷄犬無聲堯律天  
金燈精舍南華院黃面老僧燒竹烟煙竹依微寺  
裏見鴻鐘猛撞天王殿藏經包袱閃龍文菩薩實  
相琉璃面琉璃實相鎮香臺行雨龍王捲地來洗  
淨閻浮風火劫霎時珠淨洞天開洞天六六此第  
一方廣華嚴千載述陀羅彷彿化成林貝葉函中  
看佛日佛日無盡山無窮莽莽石流瑤草紅劉阮  
當年幾曾到謝李相期總未逢只今羸有高高之  
太姥乃與此山作對甌西東都在熊生屐履中

奇樹歌爲方潛夫賦

君不見皖山莽蒼垂雲脚天柱亭亭漢南嶽三春  
茅封五色壇江水東流淮水落真氣氤氳在古濠  
桐邑分置亦旁礪城中甲宅鬱喬林別墅星羅滿  
丘壑白沙村裏老農庄方家上世讀書堂六十年  
前振靈兆兩木交章畸岸旁鳴飈溢露掩平隰結  
幹樛枝蔭廣場柳條綠嫩朝雲翳楓樹紅深秋月  
長不羨華平植春圃其憐朱草豐中唐君不見列  
栢烏棲繡斧芒殿中袍笏阜囊霜又不見東甌海  
畔芾甘棠刺史憑熊奕葉昌此樹扶疎新未已淮  
南叢桂差堪擬更有紫荆與連理載歌棠棣之讌  
讌固知此樹非凡卉還看此樹千尺凌空起

海風行

黑風吹海海欲壓鐘鼓龍宮響鞞鞞巨鱗奮背亂  
吞潮捲出黃雲天亦狹曾聞海藏珍的皪珊瑚血  
紅高八尺鮫人珠子明月光波斯賈胡爭賞識又  
聞神仙居海島十洲竿竿綠瑤草黃金紫貝并流  
精八道交繩擎太寶似此皓盱拍天來靈仙異物

皆惡道嗚呼海風不惡人不平氣力雄時海可傾  
莫說秦皇鞭石走駕橋直擬接蓬瀛就是太公釣  
得文王上回頭便嘆天下清

嶺西行送張參軍新將潯梧

九疑之嶺千萬尺嶺西錯落鬱林石寒亭水浸桂  
枝辛桄榔樹子作麵食猩猩白晝學人語毒草春  
榮紛鴉羽蠻婆吹蠱障行暉蚬蛇如斗膽如乳君  
不見湘江風起浪潏潏秦皇一怒赭湘山交吐女  
子徵側反伏波將軍大戰還又不見象州安置薛  
都督出來三箭威名宿軍前免胄示胡兒十萬鐵  
騎皆俯伏

海鶴歌過白鶴嶺也

我聞閩浮提中芥子許漫擘山河與海水初生小  
兒名盤古繼之者誰曰神禹鴻濛氣蓄南條分衡  
嶽騰騰東南奔牛女星高填越門支提之前白鶴  
蹲玄雲爲質雪爲魂朝飲滄浪日脚昏夜啄長鯨  
潮汎渾佛子休誇大鳥王金色兩翅搏龍堂南華  
老叟恣汪洋大鵬負背亦尋常我數騎鶴過寧陽

仰首但逼天蒼蒼有時雨師挾雲將連天和海都  
 渺漭忽然罡風吹大荒分明歷歷見扶桑只愁劫  
 盡八萬載此海此鶴何處藏君不見依舊芥子包  
 玄黃

七夕詞 悼也

星橋絕漢斗西傾漢水瀾漸波浪生誰家綺筵紛  
 乞巧高樓混甲細彈箏人世悲懽無賤貴織女那  
 堪折玉清栖鳥啞啞啼秋早流螢故故窺堦草招  
 魂幾欲問巫陽明月愁看流白道

以上綠雪樓鶴草

七言古 二

三百篇以後至漢魏古詩鮮作七言者漢  
 武栢梁張衡四愁不一二見六朝暨唐人  
 遂禘祭之而漫衍為樂府歌行窮變極態  
 唐以降不可以復加矣然漢與唐其氣固  
 區以別矣而六朝綺艷則一時之風會也  
 初唐換其綺艷而轉為高華盧駱王楊開  
 緹灰之管煥若陽春之駘蕩神龍以後諸  
 大家歸於雅正本朝楊用修樂府七言風  
 貌絕肖四家餘體非所擅也開元大曆以  
 後李供奉飄然有凌雲映壑之才杜工部  
 沉痛悽切雄渾感慨王孟岑李各極其盛  
 本朝李獻吉長歌神骨酷似工部氣度亦  
 齊於供奉諸公嗣是丁麟元美本寧輩亦  
 已升堂誰謂明詩不及古人耶余謫居無

事漫賦消閒輒不自量分體分時亦以見  
聲氣流遷關世代升降庶幾望本朝操筆  
君子吞吐漢唐于以  
苞含雅南之盛也

### 擬漢

#### 五志歌

平子四愁厭勞京關湯盪情江湖文選  
中七言真如驪珠和璧有一無二李  
獻吉效之作五仰乃窮愁而思放曠所際  
固有不同也余今歌五志則向子平先獲  
我心者豈欲  
與二公齒乎

#### 東嶽泰山

我所志今在岱宗十八盤高磴路通鷄鳴日觀源  
煙隴遙見三山出泰鴻仙人冉冉騎蒼龍蟠木花

開千歲紅七十二家真英雄金泥玉檢白雲封禪  
草猶在云亭中側身迴望鄒嶧峰泗水西流咽孔  
叢天爲萬古開羣蒙我欲東游攬岱宗

#### 西嶽華山

我所志今在華嶽五千仞高一壁削青柯坪上氣  
磅礴玉井蓮花金作萼叔卿臺上碁歷落迎眸直  
望青天卓仙人掌劈中原廓南連關陝西朔漠秦  
皇渡口風頭惡武帝祠前雲垂脚側身遙眺函谷  
邊青牛背上有靈藥我欲西游摩華嶽

南嶽衡山

我所志今在衡陽祝融峰上雲蒼黃舜栢風雨下  
沈湘高貢尉堠連荆揚羣仙朝拱赤帝堂靈娥鼓  
瑟滄溟洋我嘗驅馬楚南鄉欲往從之路渺茫九  
疑天高百粵長東盡金陵發嘉祥更有天柱在廬  
山昔古作對撐朱方我欲南遊踐衡陽

北嶽恒山

我所志今在恒山大行王屋池其間飛狐險控塞  
雲間朔風吹閉鴈門關北宮玄武鎮人寰予中長  
劍七星斑我欲從之行路難嘗過真定雲色駭黑  
帝之神幽崖寒秋草荒荒黝虎斲男兒心血赤如  
丹何時環壁立呼韓我欲北遊凌恒山

中嶽嵩山

我所志今在嵩高少室仙人醉碧桃緱氏山頭青  
峯堯明月笙吹鸞鶴遙我欲從之神徒勞昔曾乘  
傳穎川輶大嵬之野黃神朝顧瞻嶽鄙風飄飄五  
色登封漢帝豪萬歲三呼意氣驕伊洛瀍澗共河  
包中原千里鞏神臯我欲雲遊陟崧高

擬初唐

春江花月夜

君不見流澌萬壑催花雨  
花津渙渙秋江水  
春城水東花成林  
海棠夾在江梅裏  
花落花開月月春  
城邊社鼓賽花神  
如花嬌色紅顏子  
長袖多錢花滿身  
春水照花花似雪花邊  
醉倚黃昏月清歌妙舞  
過春雲曲度春風絃  
上撥繚繞飛動屋梁塵  
月落塵飛聲未歇  
明月樓中擣衣人  
夜夜春深夢見君  
君君在金河春水外  
玉笛梅花可得聞  
何處春風

不落花何客逢春不憶家  
春水流花到江岸  
紅芳點點伴春沙  
春花歲歲皆如此  
黃公酒壚人老矣  
五侯七貴開高門  
門前上客跋珠履  
春草綠深王粲樓  
春波漂泊李膺舟  
繁華寂寞皆平等  
惟有江津春水流  
飛花流水兩悠悠  
不如滿飲陽春酒  
尋花問酒春春有  
十千買酌長命杯  
花醉常看春在手  
源水叢花古洞天  
彭澤風高五柳前  
江樹搖情春似海  
日日東風吹酒筵  
花間酒氣春風度  
春宵刻刻霏香霧  
銀燭蘭缸朗畫屏  
微醺半撲花間露



鷄鳴東方曉海煙青旭迎春滿江路

秦帝捲衣

咸陽殿前芳草春六王臺榭盡圖新離宮別館千  
千戶周廬星密衛勾陳南山表闕開雲見渭水通  
橋駕月分驅山鐸作嚴更鼓學鳳樓閒弄玉身山  
東美人闔顏色偏妍趙帶與燕裙秦帝程書讀法  
罷衣裳倒捲夕陽暝九枝燈吐懸藜焰筑聲猶似  
漸離存長城南北封關塞祝壽齊呼萬歲尊錢塘  
不息胥神怒湘水橫波帝女魂蓬萊未飲仙人藥  
水銀霎時楚兵三月火暮雲愁色起紅塵

折獄箴

秦岱先刊封禪文興作阿房繡土木穿鑿驪山瀉  
刑罰肇自黃帝李虞廷作士臯陶始予曰辟之汝  
勿辟上古君臣真喜起由來判斷重如山由來讞  
決平如水漢家蕭何能造律曹相規隨寄獄市文  
景清淨比成康武宣振厲多姦宄所以釋之與于  
公寬和篤厚揚青史班馬傳中慘酷吏報應俱得  
不良死人命何可等鴻毛出入關頭係片紙五聲

五辭宜善聽三宥三覆莫輕已朝廷法度本無偏  
疑者矜者予生比天心好德原如此君不見紫宮  
貫索常虛空斗口陰德直大理

對酒歌

春城正三月况得近湖山鬱金香漬蘭陵酒十千  
買得聊開顏虛窓獨酌伴書史世事悠悠付等閒  
盛來不須青玉碗磁罌古色土花殷嗟彼中山士  
酪酏垂三年笑彼吏部郎酣向甕頭賦高陽酒裏  
多狂客黃公鑪頭有逸賢詩人遣興都需此善飲

于今憶八仙撩亂林花飛作錦寂歷新榆落似錢  
湖水自邀山出雨山烟半裊水明天鳴禽共解伯  
翳語庭鶴雙雙舞影便此中陶令有真意何須吹  
竹與彈絃世人皆醉忌獨醒墮車逢虎醉偏全啜  
瀝同登壟哺醕類乞墦貪泉焉可酌餘唾豈容吞  
吁嗟乎闔士猶知食駿思所以伐檀羞素餐十日  
平原飲八斗淳于髡豪雄侈河朔雅集屬西園吁  
嗟乎古來酒政無專門玄水糟丘各有論唐虞事  
業一清樽方知醉裏大乾坤

以上菱棠草

擬盛唐

路虎歌

過新喻新喻人言虎在版橋舖典史騎馬送官被虎就馬邊脚靴一隻去典史無傷過分宜分宜人言府官往屬縣查盤黃昏一虎當輿輿夫散走府官從輿中對虎作懺悔語虎亦無他厥後鄉兵操從來逐虎騰去次日獲一虎解皮送府官壓驚過袁州亭卒猪子為虎攫食過辰州新店輿夫言昨有一虎搏三黃牛至平溪登山見虎遺鹿骨一具俱未傷人也戲作路虎歌

吁嗟乎召南歌騶虞楚國傳於菟至今仁獸還有種茹毛咀血未糊塗君不見紅版橋頭南山研典

史巡徼過夜半嘯聲吹起官道塵燎火黑昏人馬

亂磨牙鐵鐙脫靴奔腰間黃綬皆驚斷去脚凌兢

流白汗吁嗟乎知縣門前無數靴市馴曹胥思思

爺平時連結滿堂譁勝虎戴冠張爪牙此靴若到

縣門上笑殺臨江百萬家又不見鈴山峯勢高赫

赫府官行部威亦得橫前一吼輿廝逃獨賸黃堂

對白額幸哉此虎額非白眈眈相視不相迫府官

剛在收魂魄鄉民聚挺來擊刺此時騰傷血狼藉

明日剥皮亦何惜持獻公庭子民職府官堂上斑

文赤又不見袁州山亭失豬子亭卒憂愁渾欲死  
幾見豬子肥大時不就族庖烹酒市人食虎食都  
如此只有辰州新店堡一虎咬殺三黃牯惱得庄  
家叫天苦我看此山煙莽逼雲路深阻行人過此  
面如土三牯却饜吞噬心不聞一逐行人武還當  
到羊擊廟鼓報賽山神謝猛虎又不見平溪山上  
草侵天荒墟古墓少人煙宜有魑魍口流涎何乃  
樵丁牧豎俱熙然凡遺一具死鹿骨皜皜如霜壓  
山巔我已行山二千里徒聞餓虎食牛豕調弄縣  
官暨府官輕輕昂嘴低搖尾如今只有府官堂上  
高交椅赤文爛斑威風起更看張在車茵裏三簷  
羅蓋飛旖旎傳呼阜戴野鷄毛呵叱街頭靜如水  
蠻婆負薪換酒歌

人說武陵蠻到有莩花水直自過辰沅黔頭交楚  
尾亂峯堆裏一徑牽紅黑蠻丁住兩邊中間四衛  
相勾連平溪城子特富前蠻丁賣米足固然乃有  
蠻婆負薪不用肩黃繩純束頂顛巔雙足躡屨幾  
曾纏盛酒葫蘆甕樣圓口角喃喃腹便便將薪換

酒不換錢平溪一歲酤千釀清者爲聖濁爲賢酒  
人樂聖賢何避博得蠻婆一笑媯半醉半醒騰小  
去直向蠻夫下拜虔傾倒葫蘆強取憐纍纍繭殼  
作花鈿頭髮離披蝟毛蜷香稻煮飯紅草煙夫妻  
子母都流涎繩牀草席大家眠鼾聲直達五更天  
自言蠻是武陵仙

飲平酒放歌

和合神人洽百禮上世汗罇酌玄水風流一屬酒  
人遊賢豪爭作麴鄉侯杜康醇耐消九愁中山亦

已千日憂且向步兵厨裏問還從吏部甕頭求我  
常作令茗之陽烏程兩姓昔稱良至今猶有遺風  
在箬下春風稊稂穰燕市墟頭饒蕙苡稻粢穉粟  
挈黃梁閩中競貢建溪醕漉巾多似採茶筐只訝  
楚人無釀法酒星不照洞庭蒼吾希平溪東門之  
澗清湯湯潑茗挫糟皆堪嘗相逢顏面多渥赭磁  
罍滿注帝臺漿吁嗟乎古來醴醕賦瓊觴舊事于  
今悉渺茫淶口近在湘東曲鄱縣元臨蒸水旁昨  
已扁舟窮二水誰將米汁泛銀牀底怪軍城如斗

大竹葉青青鷺兒黃秋冬之際降微霜家家采菊  
漫滄浪蠻陬夷落新秋米黃昏手碓鑿香秔荻家  
洪家相敵手却于無佛處稱王客舍寒更費嗷物  
史漢燈前大戰場

紅苗歌

君不見邛作東頭青天卓五溪溪上山礮确紅苗  
路直平溪邊軍城三舍皆蠻落大種還屬長官司  
小種畸零脫戎索刀耕火種禽獸居却有漢人相  
連絡猿猱登山走如飛紅布纏顛復纏腳清晨白

日打鄉屯殺氣迷天天色濁長鎗儼如文蛇頭楮  
甲酷似介龜殼口銜短刃放霜光腰橫大弩擊月  
却矢長三尺鐵鏃尖伏莽射人人不覺蹲身跳盪  
珠滾盤牯牛陣法電閃摧僮男振女一齊牽姦汗  
椎楚多般虐君不見鰲峰一帶哨兵屯千兵難與  
五苗角只有今秋擣巢多遮斫級掛橐竿苗落魄  
雖然報復是其常除却鷓勳無計撲赫赫風搖帥  
府旗軍前羽蓋如連幕定有龍韜并虎略吁嗟天  
網洞恢恢豈肯盡稔蠻夷惡一夫決命便無前誰

云七擒不可學又不見鱖魚堡上紅苗薄數箇健  
兒相倚插一箭恰把苗睛瞞至今孤戍數村煙火  
人安樂

黑苗歌

漢家疆土直天南黔中古郡瘴煙含箐叢夾路風  
吹草隱隱烏蠻戰氣酣酣戰無煩標黑幟蛇矛蜂  
矢兔趯趯青布三尺裹上頭下體單露雙脚赤赤  
脚騰山逐白雲喊聲一起亂紛紛種類雖繁無詭  
計志惟禦貨不屠人君不見鷄鳴關上如蟻薄五  
尺天險何人覺一直走到清浪城應考諸生皆被  
略略得青衿身上穿次口覓食酒壚邊箇箇都被  
村民縛官兵追到渡無船眼花落水水淪漣淪漣  
流水石溜沔老烏啞啞暮雲黑官兵不戰功亦得  
飛書報捷馬如龍大將門前排畫戟

犵獠苗歌

高辛小女嫁槃瓠武溪蠻種是厥初猶如夜郎王  
姓竹水流竹節剖兒雛至今蠻姓與人殊一種苗  
將犵獠呼畸零射獵自爲徒諸苗煽害彼獨無習

種山毛但荷鋤薦居草屋似猿狙最是腰間一張  
弩上落飛鳶下殺虎毒藥傳矢有秘方殺人只須  
血濡縷生兒八歲便彎弧長大不知山險阻更能  
爲人已金鎗豈是蛇兒操藥杼種兇性馴亦可矜  
倩作農兵堪禦侮紅黑諸苗都畏之箭頭一着無  
處所當鋒匍伏草菁中流矢陰飛莫逃雨野鷄陣  
法古無圖蟻垤蜂房寧有譜婦人喜着花紋衣纍  
繭簪頭如繫組雜處山樊鮮伎求射生逐肉歷寒  
暑非驢非馬烏孫王或者槃瓠是其祖

以上青玉堂采薇草

蔣太史八公暨弟進賢大令鍾湖王母及母

兩夫人壽

君不見見閩越星分南極旁天孫清切斗牛光又不  
見武夷峰外雲蒼蒼紫帽玲瓏金粟黃龍藏海屋  
蟠珠母鳳哺靈雛叫女牀蔣家三逕幾曾荒桂樹  
梅花接路香金馬門前大隱客太微垣裏依烏郎  
當年一髮千鈞重今日雙慈百壽長嬾姑耄耄真  
希有期願還拜紫泥章看看青鳥啣書舞西姥同



正行書 七言古  
欄太姥觴酒酌琴堂饌玉堂

切音砌

以上青玉堂采菽草

采蓮曲

采蓮曲本西京太液池中宮人泛舟為巴人權歌也民間安得有金環玉腕越羅齊紈游泳水戲之事作者甚多漸失初意茲不作新艷語而擬初唐體為之亦古人飲食祭豆間之意耳

咸陽百二鞏山河漢主離宮紛綺羅太液池頭仙

掌蠹昆明湖底劫灰多石鯨鱗啞銀潢水豫章臺

浸下津波闌干曲曲被文繡采石磷磷砌蟹螺五

牙教戰披犀甲三翼凌風載鐵弋沙棠槳棹黃頭

豎雲母牕遮紅粉娥魚麗陳收香霧起雙鬟齊唱

采蓮歌

蒲萄酒

從西域海中來者甘而烈醇而厚厥色絳紅清瑩無滓山陝所造似不及也夜飲數杯微醺為作此歌

禹貢稱皮服周書紀越裳漢朝鑿空去聲通西域可

若明時萬里航波斯賈客珍珠腹虬鬚螺髻雙睛

綠大舶如山裝海島王面銀錢通販鬻攜來良醞

盛鴟夷蒲萄釀就軟琉璃大宛富人藏千石轉到

江關塗路曼琥珀殷紅人競看看似春城長命杯

夜深微醉月徘徊醉後開窗遙酌月九萬寥天六尺齋

### 湖中對酒歌

湖外邀來江外山湖中長得主人間主人對客客對酒酒酣歌和水雲間一唱曲是烏鹽角再反題爲菩薩蠻君不見桑田歷歷變滄海白髮俄將紅顏改酒中萬事等混茫醉看白雲飛鬢鬢前面漁歌爛熳聽棹入花津聲款乃

### 孟門行

君不見青柯坪上仙人掌劈開華嶽分爲兩黃河  
戶央地中行浪沫噴天天曠瞬又不見巍巍神禹  
鑿龍門洪流激箭望東奔盟津津口如雷電砥柱  
孤撐勢欲吞雖然險絕猶漕轉請看石上挽舟痕  
最是世間輕薄子翻手成雲覆作雨簷前不銜黃  
雀環搖搖暗掉雄狐尾愚弄多少聰明兒藏刀笑  
裏深無底孟門何曾險如此

### 董宗伯玄宰法書歌

文籀以後書不同禹篆秦鐫自古風蔡邕張芝名

季漢真草直至晉時工鍾王之筆欲行空龍跳鴻  
飛天海中唐宋以來多哲匠大都不能出其宗

國朝名手起二宋吳士競以柔翰弄祝家狂草枝  
指翁文氏父子稱書種如今筆法推華亭氣勢縱  
橫不可控臨摹舊帖勝於真片紙擲地黃金重更  
能方丈作榜題畫如值竿錐印泥蒼秀明潤山雪  
霽蕭疎轉折密雲低腕間蠕蠕蚪蚪動春花夢入  
兔鋒齊有時得意楮穎表驪駟滅沒秋鷗矯楷書  
姿態箇箇勻細繭抽絲染明妙邇來野鷺並家雞  
不將此量誰分曉我嘗逢君在帝京詩字淋漓剩  
有情況復與我寫山水一掃萬古開精英意匠經  
營嘗黯淡縞素漠漠煙雲生君今官高更壽考臨  
池意興飛縹緲疑是方朔隱金門且從安期分海  
棗將君真蹟坐來看松窓旭氣通虛顯

哀江南

以麓率眼前語入歌行盛唐時有之  
杜子爲甚氣格蒼莽可觀初唐則不

然也

數歲江南非樂國水旱頻仍兼盜賊督賦征催猛  
捕蛇買米轉漕程時刻電如鵠卵打春苗淡日冷

風生蝮騰食貨價直兩倍翔鄉民入市顏面黑况  
復官府嚴遏糴開糴半款抽豐客訟師學霸把關  
津來往販糴遭逼勒刺奸解腕真桀魁何異橫民  
望屋食老婦携兒自鬻身行行道路延喘息幸有  
福主許真君此地無憂仗神力流賊過江過不得  
江南猶勝在江北

### 題邵樗休呂白水

邵樗休名夫丹陽人任俠  
自喜有縱橫才人莫之測  
也隆慶初新鄭相高為人儕家居憤憤欲  
有所出之日久矣未之能邵竊語人曰得  
數萬金行購立可令起已而屈指日某某  
某合之可贖三萬金果如所徵予之便道

一過新鄭日賀公且起趣治舍人裝微語  
其故不竟而別乃徑走都下貴人所為道  
地而新鄭公果召柄政于此遽自匿不見  
德不映火丈夫哉猶流連未去江陵已側  
目新鄭亦不能安之相與就司馬譚謀之  
欲寄之將守邊者所詭以立功名封侯事  
初不疑遂至塞上不至乎以月數度將卒  
驕不可使功名不成為天下笑且曰我所  
求何等而循尺寸與齷齪者伍遂跳歸歸  
又不能自匿歛時時往來諸所嘗遊故人  
所酒酣慷慨嘆息將故以其去使白之新  
鄭江陵使客微伺日夜不息益恐且虞他  
變以幹吏為郡尉圖之伴與親善往來甚  
數而家忽多怪其弟亦智人勸其兄無輕  
過人日兄名傾海內得無有謀劫刺者笑  
以為誰敢哉而公可易量家已畜數百健  
兒頗自衛尉來飲既醉約過已飲食遂從  
數十人往尉已伏卒入即擒之立搥令死

死且罵曰而敢約乃公我誠眇爾故非爾能也亟發兵掩其家其弟已聞之即席捲去不獲一人武進沈光祿應奎邵壻也以乙科起家為卿寺為人亦任俠好急人嘗活死士得其力守裕州廉惠有去思為郎刑部屢建言則時人所共言者不足為異太守汀州皆顯政績老為南光祿少卿與余善嘗問及其婦翁邵事云邵同時又有呂白水者嘉興人往倭夷方開總督胡公往請約為兄弟與軍中謀其誘致江賊等及殲徐葉諸寇呂謀居多以屬郡布衣而使制帥為兄弟交事固甚奇且不自振暴人鮮能知以功名見忌胡且不免而呂無它斯有大過人者狀貌不踰中人視瞻落落落華亭相徐公與新鄭構難呂亦與謀之而解此其能緩急人誠異哉所聞南昌劉文簡嘗與余詳呂事曰呂亦走都下中貴人所華亭家居難屢作皆新鄭指呂佯好

新鄭而華亭實資之通內中貴人多折服其風議而亦與江陵游當萬曆初元呂謀去新鄭而時為奇策動之新鄭直人時時請教呂給之曰今主少國疑公擔任甚重萬一有他天下人嫉忌公者不少公無處所矣公曰計將安出呂曰公知祖制立宗人府之意乎凡常主少國疑之際得宗室長老祭酒在中鎮之百變俱弭矣新鄭大以為然次日即具疏請立宗人府不知呂先已宣言於內曰高公殊有絳侯陳丞相待諸呂意兩官正猜懼而高疏適至慈寧急遣密璫就江陵圖之江陵正喜於構會即曰逐新鄭騎蹇驢出國門而華亭之難紓矣劉子威比之劇孟是耶非耶大抵正人君子宜厚防此輩也

自古吳中生怪人繡水丹陽有特聞繡水之子呂

白水丹陽邵夫相等倫邵子任氣尚譎數呂子深  
鷲能韜神居恒揣熟蘇張術布衣直入五侯門高  
譚廣坐稱上賓最是田竇自傾移回天轉日少人  
知廢置宰相直唾手數萬金錢如取携邵子矜功  
不斂跡自以新鄭居貨竒江陵爲校善伏匿一吏  
死之無費詞所以道家貴守雌呂子好俠亦喜兵  
督府軍中料敵情功成不見受高賞雅遊江海負  
時名柰何秘授華亭指居間官府作縱橫借力江  
陵逐新鄭設械傾危莫敢櫻比之劇孟失題評太  
上清高魯仲連却秦存趙意翩翩千金一蹶聊城  
矢冥飛東海傲雲煙其次朱家與郭解急難施恩  
不自賢雖以好聲成敗異千秋萬世猶相憐隣者  
直筆司馬遷輓近侵尋無古風前行豎子兩稱雄  
吹噓一是田生類矜賢豈與卒史同自此以後皆  
鷄狗候伺中貴作牢籠安得平津贊漢武誅夷此  
屬遠神叢蕩平傾側亮天工

題沈石田畫

吳門老翁號白石胸藏丘壑畫成癖橫披縑素散

晴霞斧劈混芒起山脊山氣霏微根脚蒼水色空  
明波浪白融鑄古法自我裁荆關董巨不牽迹湖  
岸人家門不關平頭舫子對隴間高松刻劃老龍  
骨幾片湘雲護竹斑峰頭直似青旻削瀑布迴流  
捲峽彎點雪一天江野靜六月寒生几案間設色  
勻勻噴墨汁濡筆含毫雨霽霽金粉滴香鉛露融  
玄烟漬玉土花濕意匠經營景象先兔起鶻落取  
勢急圖成迥覺聚精靈點睛疑有蛟螭泣君不見  
匏菴居士本朝賢文字聲名舊傳又不見文家  
待詔擅賞鑒許可交親都下泛漚君手蹟與君遊  
湊成儒雅共風流將軍已得丹青引給事長將綸  
水留我亦貴目不貴耳知音何敢浪比擬嗟君遠  
意少人知占道不存輕薄子屈到如今稱畫史憐  
君本意欲棲真寄興揮毫別有神畫畢詩成雙美  
合相逢處處遣情塵所以古來高曠上屢貌尋常  
行路人掛君長幅展君卷滿堂高壁一梯雲

以上華甘樓言意草

五文人歌

李空同 夢陽

慶陽山氣連靈武入塞黃河開地戶遷生龍門固  
扶風文章一派肇西土正嘉之際始崢嶸李子崛  
起紹前古飲餐秀潤臨春暉剛繹鴻瀕超儔伍草  
疏擊璫泣鬼神大小臣工同捋虎文章氣節兩合  
神莫笑坎壈纏其身自是盛名招眼白才人儻葛  
宜長貧大家作法具經史得詰一振千古雲詩卷  
長畱在天地輕薄之子安足論

王元美 世貞

國朝草昧開東隅金華青田擅操觚成弘之際文  
運起晉江毘陵俱通儒是時制舉攻時義古文尚  
未闢亨衢繼北地者為王李王子博貫善招呼歷  
下大兒孔文舉其實弁州莫能圖罕恩單柳低煙  
碧天日含雲落五湖胸開武庫羅經史氣韻清鮮  
吐蘭芷著述篇章堪汗牛此道還應執牛耳四部  
詩文今具存後賢何得浪比擬

李于鱗 攀龍

歷下名山華不注東隣滄海隨煙雨蓬萊蜃氣現



龍宮織就鮫絲吐文縷于鱗挺秀青齊間白雪高  
樓獨軒舉詩摹漢曲止開元文迦禹禪藏响嘍哦  
睂雲霽石霞孤峭壁寒嚴松色古經綸開濟治邢  
州太行雲物卷篇收七子之行穰巨擘玩世依隱  
泛虛舟時時卧閣能清淨蔡姬磨墨何風流只今  
華嶽登臨記洗面盆傾玉女頭

劉子威鳳

吳門文命屬元美同時復生劉子威元美豐贍兼  
秀逸子威沉鬱更崔巍倅繩輸墨良工苦周鼎商  
彝賞鑒稀朴雅獨宗秦漢語尖新斬絕晉梁辭為  
氣不肯輕降下日無元美又何誰文必經傳與子  
史詩則高岑暨杜李古色照人金石聲曲水重山  
氣如此由來評論自歸真豈得循聲徒貴耳大雅  
深純有獨傳文壇麀對無堅壘

李本寧 維禎

竟陵原是楚材林太泌山人真可欽著述富與弁  
州比鍾期自賞伯牙琴古作落筆皆漢語詩篇啓  
口似唐音祇因晚年門下客集類代作失高深紛

文苑行書  
七言古  
紛紜進多輕易前輩相將謾語侵我嘗同君爲九  
列同在金陵相劇切時君白首號能言惟我與君  
言相悅君文付梓懸國門精彩陸離氣超越試取  
謾者作同觀何須法眼辨優劣

西文人歌

何大復

景明

灣高流下汝南水信陽泉石尤清泚何子文如金  
芙蓉秀氣淋漓香滿紙孤雲片月鴈行單落日寒  
林叫山鬼古作平穩亦標鮮詩似幽桂叢中語自  
云舍筏岸先登空谷楚然誰至止緱嶺卅丘停鳳  
笙箕山白鶴銜松蘿矜抗不與世人宜客至留門  
不倒徒衡文學使眼空高一字題評成有美品日  
應當說李何俗口隨聲說何李

楊升菴

慎

當朝黃閣鼎臣賢復有佳兒甲榜先顧命乃公功  
捧日封章是子氣回天明倫 聖主從新貴謫戍  
孤臣獲遠遷雲南洱海來才士著述奇書天下傳  
六朝麗藻疑吞鳳萬里風塵看墮鳶齊梁陳宋能

兼美盧駱王楊並闔妍後漢堪摹出師表初唐不  
讓帝京篇較勘差訛分帝虎鑒裁今古錄丹鉛可  
憐驚令江中水不返滇池逐客船

汪南溟

道昆

黃山塢外日頭黃白嶽巖前雲脚白精氣騰空誕  
降神生出人才作詞伯汪家司馬宿高名却與弁  
州交莫逆詩從燕許立規模文師左馬成標格太  
函一集廣苞羅滿架圖書楊子宅春水瀲文潌淥  
波曉山蒼靄霏靈靈擬古雖少康衢謠識時却有  
安邦策君家族子盛林林大鄣郡裏高門額屈指  
熙朝壇坫中誰人筆陣風倅易

湯若士

顯祖

臨川筆秀汝河清才子談文舊有名玉茗書堂克  
棟卷霏光上射碧霄晴風拂暮雲寒綠玉月映朝  
煙護紫莖漢殿銅盆香裊裊幽山桂樹葢英英簾  
鈎賦擬滕王閣鶴伴吹疑子晉笙胸中錦繡鮫人  
織紙上波瀾海怪擊抗疏排雲扶直道遷客孤身  
一葉輕官薄南曹編典禮堪嗟世眼不分明但唱

牡丹亭下曲誰和青蒲折檻聲

林孔晉寄劉春虛詩刻始知其籍靖安邑人  
舒春陽考辨最詳喜而歌之

豫章龍沙望西北千峰萬嶺暮如墨古時昌邑海  
昏間却與匡廬連地脉遠公蓮社結東林柴桑五  
柳淵明宅盛唐以來劉春虛棠棣鄉都剩遺跡青  
谿每有亂花流丘亭野壑煙巒碧懷思緬邈孟襄  
陽寒遂孤吹天一方美人蕩漾江南曲歌聲怨色  
起滄浪霽雲幽石尋先隱風雨滄洲問海商臨水  
醉酤歸鴈後閒門深柳讀書堂蚤歲分符官夏縣  
沿途竹馬進壺漿君不見李新鄉歌贈紅鸞玉樹  
章男耕女織蒙惠化雉鳴麥熟秋稼穰又不見王  
龍標京口期相望海門夜宿天起霜高渤海賦別  
意悲涼清風萬里一江長

偶過楊無我酌蒲桃酒因言偏頭鴈寧黃河  
鯉魚肥美時久雨早禾不登勦練二餉難  
供漫賦寫意

夏長已過端陽節亂雲疎雨鳴鴉鳩着袂相過子

雲亭頃刻盤尊隨意設并州美酒酌蒲桃醇甘石  
蜜殷紅血因君備兵鴈寧間爲說黃河如丙穴錦  
鯉銀鱗三尺長鮮肥塞上酥流滑剪燭不知更漏  
添濕泥漏映半邊月兵荒懊惱困徵求舉箸席前  
難下咽廟堂諸公憂責深草莽奚饒恤緯舌

憫雨

仲春之月桃始華其柰經旬雨無正零霧繁靄舞  
幽螭長離掩曜沉滯盛豐隆奮椎何砒磷辰星函  
劍太白暝浥濡湛肌重御繒匹馬衝途潦及鐙江

湖漲溢原隰平五沃墳壩遍泥濘皇天化產本榮  
敷寧忍黎民淹困病駭波奔揚橫沸流舟車阻隔  
罌餅罄租吏追呼似石壕係累鞭笞鮮善政人心  
姦宄百般生勝人須待皇天定堯水九年稱警予  
當時萬姓歌明聖天心回鑒便昭蘓仰望蒼蒼宜  
祇敬安得朗旦披玄雲五風十雨稱嘉慶

喜霽

大雨時作蒸濕土謬意愆陽歲不豐忽然陰沴皆  
滌蕩九霄晴旭麗長空修景昭晰開清旦羲和騰

駕馭飛龍若木始昇曜初杲直映薄暮澄蒼穹和  
氣薰天無焘焮青青百草鋪丰茸黃鸝徙樹調新  
語紫燕歸巢趨舊宮曉看珠露凝筠葉夜流珪月  
入階慮蔽芾參差搖樹色繁鸚諺媿裊花容農夫  
服罽芟春草饁婦儲糧急早春應知霞蔚迎朝霽  
便喜雰昏散晚風煖着淥池魚躍亂光浮青猷鷺  
飛重欣占易象離明啓萬彙繁昌荷化工

以上英石館調風草

秋槎自皖至芻油一日二百里歷小姑彭澤

馬當諸險山奇水廣心目為壯作江上行

大風吹江江脊天江上高山斷復連神鰲不受金  
鈎餌觸動蛟螭浪作顛伊余一葉凌蒼烟百里瞬  
息不遭延當江煥燿參靈變隨山次第指奇褰筆  
墨飛凌鴻鵠陣觥觥醉奪鬼神權吁嗟乎孟德老  
公乃不敵周郎少年聞雞急着祖生鞭割去垂龍  
左耳朶馮夷川后各安然就是晋朝南渡日還有  
溫嶠與謝玄分付天吳暨罔兩屏息真龍口下涎  
長江萬古淨娟娟任從滄海作桑田此水東流不

變遷龜鼉為梁水犀船浩氣淋漓太始前

花朝次日觀龍沙營房

江上鶯花恰早春龍沙咽浪撼江瀉欲教赤幟開  
油幕免使蒼頭恩市人挨排次舍成營壘橫行直  
列擬魚鱗莫漫沙中聽耦語須看里室息紛紜諸  
葛陣雷魚腹舊尹鐸功垂保障新君不見心宿騎  
官連積卒天綱東壁羽林屯

以上延喜堂擊壤草

文直行書

詩部卷之六

明宮保尚書壇石熊先生筆

男人霖伯甘編

五言律

竹里

竹里雩西宅城南古豫章水田春浸綠雲樹晚拖  
黃菊圃兼書圃農莊帶墨莊求羊來曳履吾與詠  
滄浪

園

近屋場爲圃編茅覆小亭蓮花長夏渚蘆葉晚秋  
汀散步牽荒蔓澄心挾古經畦蔬時自灌卽我是  
園丁

池

江山宜褊性避世有墻東碧浪搖池濶青臯望野  
通菱繁魚近岸柳暗鵲歸叢爲問林居趣羲皇太  
古風

竹逕

茅護羅含宅筠香蔣詡居適情惟聽鳥遠俗只觀

魚熟雕胡飯牀儲鴻寶書竟閑時對酒夢覺總  
遶遶

月季

三年成楮葉吹息必天工應問生萸莢知秋落碧  
桐未聞寒暑易而不苑枯同一種尋常植偏能月  
月紅

岳州道上

早秋涼送爽禾黍碧天風馬障山花拂驪歌竹塢  
通嶺嵐橫匹練湖靄隱孤蓬今夜巴陵月清猿客



枕中

章江寺

野寺空江外鐘聲送曉風上方青郭對高座紫煙  
蒙岸際桃花嶺舟虛箬葉蓬西山看直北九疊到  
廬峰

以上綠雪樓齋草

五言律

皇帝登極志喜

泰昌改元

新皇初秉錄萬物覩飛龍花蓋通三極虹幡拂九

重圓丘方望幸長樂始聞鐘大肆金鷄詔 天恩

雨露濃

其二

升儲曾拜舞東閣仰威神問豎龍樓迴隆師鶴觀  
新寶符今啓泰珪質昔稱純日月臨鐘律陽生萬  
國春

鴻雪館

太姥山新  
建之館

欲種玄都樹希求煮石丹樹開紅雪落丹熟白雲  
寒列笋關銀牒攢矛護玉壇肉芝如可採鴻羽願

高騫

偶述

聞天不可極官况瘴煙清鉤黨摧人老思鄉問月  
明祇知藏短翮誰向奮長鳴若論窮通理漁歌秋  
水平

其二

聞道金臺上天衢振鳳麟爲逢長夜旦俱際盛時  
春命達文章掩名高祿位迤自然消息理應與智  
人論

野望

寂歷山城曉楓林古戍西白雲連海濶青島壓潮  
低歲稔看秋獵時平聽曙鷄憑將黃老意吏隱卽  
棲遲

逍遙閣

東南天地外官署一山阿水戰魚龍舞風恬鸛鶴  
歌樓高觀碧海樹老見青羅吏隱人無避深藏得  
意多

雨夜

五言律  
風雨孤城夜閩中一郡偏潮聲淩鼓角烽火照樓  
船南越全規海東甌半壁天乾坤無限夢高枕思  
悠然

其二

漲海黃梅雨中宵殊未停漁燈攢斷岸螢火閃疎  
櫓戍靜風鳴柝更嚴吏止亭綢繆惟視力敢自托  
飄零

聖水庵

靈芝青嶂削天乳注龍湫佛座居雲裏鐘聲度海  
頭千年丹井滿萬个綠筠幽飲水真吾分長生自  
已求

其二

凌虛千仞上一似探河源玉井秦山在金莖漢苑  
存攀高迷宿鳥挾秘嘯清猿莫許白雲起翻將聖  
水渾

偶詠

南方氣候煖風雨亦微寒紫燕窺紅壁黃魚响碧  
灘撼波多水母問俗少珠官留滯同真隱青山日

日看

其二

閩中天外郡况復古東甌只有鷓啼夜曾無鴈叫  
秋荔枝沿浦淑篁竹蔽山丘直置風雲氣隨時狎  
海鷗

百洞

千年靈秘物廷尉恣冥搜禹穴疑堪探龍門似可  
遊海光天鏡落江影石帆收吾興端非淺青鞋不  
自由

梨嶺

舊有暴客福安令張蔚然亭其巔

陸海兼天看銀河在袖携龍王騎碧島虎子掛丹  
梯萬里蒼茫合千峰縹緲低都亭今可憇關吏戒  
晨鷄

白鶴嶺

霍童削天壁此嶺復岩堯一鶴雪中舞六鼇雲上  
朝紅泉飛火壑白石駕仙橋日馭扶桑外羲和如  
可招

以上綠雪樓鶴草

河街

楚岸千峰外青青草色齊因閒常出往乘輿輒攀  
躋漁子驅山獺樵兒捕竹鷄春風應解意今度夜

郎西

逢陳文學邀飲其家蓋臨江人寓有江西布

客

卽景常行郭相逢桑梓人衣冠遙戶籍商賈近風  
塵共語天涯意同悲客路身殷勤一斗酒千里故

閔春

小千戶瑯大綬新葉官來謁

軍城荒服近千戶襲前麻騎射曾經試韜鈴亦拔  
尤新從燕地客可作楚鄉愁紈袴毋同俗風流自

小侯

其二 瑯有爲此部郎者

去日荆山遠歸來易水寒少年應努力壯歲可登  
壇總角雌雄劍垂髻鷓鷯冠君家文共武同舍有

郎官

編竹

家鄉居竹里時問竹平安一自擔簦後淇園何處  
觀倩人編薄籟乘興作迴闌綠潤猗猗裏紅芳徙  
倚看

其二

垂鞭過楚橋芳岸碧迢迢野戍雖荒裔山城未寂  
寥砌草春無限闌花夜亦嬌塞門非版築疏綺隔  
鮫鮓

津口春望

南方春信早候鴈渡河飛倚棹通津口雲山似合

圍村人椎廟鼓屯戍掛征旗何日金雞唱垂鞭趨  
馬歸

廿四日

離家一百日歲杪復逢春夜坐燈前卷晨興客裏  
塵風謠詢牧豎月旦聽嘉賓飄蕩今如此相逢似  
舊隣

其二

除歲行將近家家祭竈君椒盤辭臘月銀燭耀春  
雲但值羈愁起惟憑濁酒醺挑燈清夜思窗外雨

紛紛

惠酒禮者多竹鷄鷓鴣斑鳩

作客三千里恒愁館穀貧廢勤猶厚俗稠渥自芳  
鄰家醞花間釀山禽席上珍世情多冷燠此地獨  
同春

其二

天涯漂泊客行李一擔簷雅士還相敬戎官亦疊  
承射生登鳥肉貯酒絡蠻藤寄語歲寒友新知勝  
舊朋

雨晴

山際春雲薄堂前蠟燭華叶霜開鴈路浮渚競漁  
父細草薰芳徑新條長嫩芽射江紅日色應炤故  
園花

其二

旭氣烘成溼春雲去地高行人收雨屐戍士曝霜  
袍竹色搖虛幌溪聲殺怒濤尋芳何處是携酒出  
青臯

廿五日

出郭報任文學請任爲老媪僮媪  
能醫藥因同鄉舊家并見其小女

市樓煙樹外出郭路無多帝女桑難採仙人杏可  
歌章縫恭白髮鄉里見青娥渡口花源水秋橋隔  
絳河

鄭生維嶽惠醬醋

貨殖傳醯醬食殺自有官薄資忻味淡逆旅厭餐  
寒自笑調和苦應知爨理難殷勤良士意持作五  
齊看

孝廉惠歲脯

百郡興廉孝邊黔地更清烏裘無剩物黃卷只孤  
城禮數因風厚周旋為客情春程應不遠儕俗眼  
方明

春初城上

雉堞逼春陰周遭爽氣侵竹光招亂鳥泉溜鬪鳴  
琴小市春山口長溪古渡潏試看幽曲處何異碧  
桃林

其二

南山朝雨暗北郭早霞鮮氣候由春幻風光置日  
偏驛樓羣走馬漁浦聚行船最是削成壁苔文剝



古錢

貴寧道胡少叅見枉

黔中雁戰闔文武盡徵才羽檄從西急旌旗自此  
來春花榮馬首荒戍憇行臺寂寞流人戶還為長  
者開

讀閔制置進兵形勢疏

仗鉞稱都護威名自久聞勅書天上給賜履日南  
分露布平蠻策風傳諭蜀文不須煩廟議從此縛  
山君

其二

一家兩司馬萬里控蠻夷貴竹新經略滇池舊視  
師金韜分虎豹玉帳陣熊羆談笑壘篋合方纔着  
定碁

李叅將任清浪過謁

君家楚邊衛縹緲洞庭雲自古十三望隴西猶著  
聞虎頭飛食肉猿背射超羣今向黔中去人稱李  
氏軍

其二

故李將軍後威名大樹看  
鈴經新武節綵筆舊儒  
冠談笑輕裘動光芒短劍寒南方今小試行矣近  
登壇

朱白岳直指按滇還途見枉

滇池行部罷驄馬獨騎歸  
萬里埋輪氣三年破柱  
威聞天懷舊雨楚戍借清暉  
干旄相逢後依鳥暎  
紫薇

其二

清漳稱國士臺憲號雄班  
繡斧搖邊月卿雲擁楚

關采風西洱海問俗點蒼山  
衮職今無關鳥啼白  
簡閒

思石道向憲副便途見枉

談及解黔圍入大方之苦久不得他

調賦  
慰

謾說黔師武多君久歷年  
解圍關漢月擣穴闖蠻  
煙戰苦刀花黑兵驕血草鮮  
天心良有待切莫嘆  
迤邐

其二

我維南楚客君是郢中賢  
傾蓋君如故披襟我自

憐黔花開戰後成  
雨落春前逆旅殷  
勤意相過思惘然

小年夜

春迴已十日微霰尚漫漫  
詩思梅花伴鄉愁  
秫酒寬軍城猶玉  
邃客館亦椒盤  
氣序皆天定無然  
厭歲寒

其二

四氣各留餘明朝定歲除  
芙蓉春到枕蘭茝  
客爲居祭蜡因鄉禮  
挑燈讀古書  
西南天地內自得亦

遽遽

除夜

杓斗攜龍角昏搖柝木津  
到明方啓泰  
多日已迎春  
筆彩臨燈燦  
鷄聲忽曙頻  
應知消息理  
一氣自新陳

其二

守歲罇多酒逢年醉  
獨歌蘭缸輝  
硯席火樹拂星河  
月朔寅前合  
春風子後和  
從容聽玉漏  
不問夜如何

元日

芳辰開泰象元日客中過錯彩花箋勝浮罇杯酒  
和宜春人競帖獻歲鳥爭歌入律東風動迴看淑  
景多

其二

瑞靄新堯曆青雲蔭楚城闌花如解意爐氣似關  
情斗指龍躔重風歸鴈序輕春初多勝事燈燦九  
枝檠

人日

歲功看運轉浪跡尚居停氣朔稱人日風煙伴客  
星新詩三復就宿酒五更醒閒看梅花片春粧展  
畫屏

其二

密雲幾匝月今始見朝暉七葉堦熒影千條岸柳  
痕鶯聲還未試菜甲可供殮水泮河津上春沙映  
小邨

元霄

圓月今宵對春香花露微星橋開鎖鑰火樹吐芳

文正行書  
五言律  
菲金鼓通城度笙歌徹曉飛天南孤戍地猶借上  
陽輝

其二

軍城三五夜勝事競深更穠李叢中醉梅花笛裏  
生龍啣天鏡轉鴈度斗杓橫遙憶家山月應同此  
地明

送黃二爲太僕之偏橋

悠悠同失路君去楚橋偏郡縣皆荒服山川半瘠  
瘞星槎浮海客戍鼓動蠻天莫謂茲行遠艱難自

昔賢

其二

君昔黔中謫官爲幕下寮舊遊經雨露新法望雲  
霄挾得詩千首還須酒百瓢舞干應有象持此格  
三苗

清明

上巳誰脩禊蒼茫楚色遙雲深潑火雨風靜落花  
朝遣悶行山郭尋春渡野橋拜違丘墓後東望路  
迢迢

中秋

移寓息茅屋涼生秋雨過南山開爽氣北斗掛晴  
河地逼花風少天晴桂月多浮杯聊獨對鄉思更  
如何

重陽

久辦登高興其如雨色深琴書雖靜好衣履半侵  
靈野菊閒相翫村醪醉自斟旅懷幽鬱處玄對白  
雲岑

冬至

荆南揆日景黃道喜迎長葭管吹灰起梅花吐氣  
香翫雲占歲物拜詔束歸裝飄泊經年外陽迴北  
斗旁

其二

茅簷向暖日陽律動黃鍾筆呵風外勢花點雪前  
容半夜鄉心劇先春聖澤濃挈壺頒大曆萬國仰  
飛龍

拜詔歸經便水驛值雪

候曉辭黔服凌晨入楚臺宿雲鵬徙去殘雪鶴飛

迴古驛紅梅發空江白舫開皇塗今蕩蕩應賦北  
山萊

辰溪讀陽明詩

二酉山邊路盤江一蓊航石樓藏綠字鍾乳滴玄  
霜五水分溪細羣峰合面蒼英雄塵壁詠猶作夜  
珠光

武陵

試聽橫吹笛干城萬里才雲連黃帝野風近大王  
臺水市看魚集沙汀聽鴈來采菱兼種橘懷古思  
悠哉

以上青玉堂采薇草

五言律

三

半山園同劉去非徐季良謝發可攀傅大司

馬陳總憲兩公祖

園開鐘阜下壑響與雲穿野竹搖城暗琪花照席  
妍賓朋邀入座陪從集羣賢共對甘棠樹清陰未  
改前

其二

鳳城連紫陌誰道有真山  
惟石留雲住清泉抱郭  
灣日遲堦草碧春老徑  
花殷此會東南美堪題  
玉筍斑

聞聖駕祀朝日

聞道中春月天臨朝日  
壇東郊羅萬乘北闕舞  
千官清蹕神明護香輿  
錦繡攢羲皇初捧轂陽  
氣滿長安

其二

帝制依時令乘春節序  
佳靈旗連霧捲仙鼓並  
雷搗望祀行虞典登封  
陋漢家南郊曾托乘就  
日思無涯

後湖見荷簪

二里香堤路高城水影  
南藕根饑鶩啜荷菱醉  
魚酣岸色舒深綠湖容  
帶淺藍採蓮還有待何  
事早遺簪

雨霽

多雨南中夜微茫拂曙  
晴高雲看度鶴喬木聽  
遷鶯潮撼丹陽郭春深  
建業城晝長人吏靜詩  
酒獨



舍情

以上青玉堂菱棠草

留都赴召魏國徐公同年友劉去非諸寅僚  
餞於莫愁湖之勝基堂

鳳閣飛丹詔江東驛路傳上公開綺席寮友贈華  
賤選勝新亭畔臨風賭墅邊應聆吉甫誦持此去  
朝天

渡江別文武官屬

節鎮長江舊澄清意未灰軍麾迎遠浦祖帳列高  
臺北岸辭吳甸西津別楚才諸公相慰厚感激重  
徘徊

望鳳陽渡淮

山水含靈氣蒼茫楚國東北行看近日南望想歌  
風原廟藏弓重初陵敞殿旣雄寄言諸守相亭堞莫  
虛空

抵京上謝疏奉旨卽行陛見不待常朝

帝城朝望迥拜疏復明恩側席催趨陛虛懷佇闕  
門瑞雲仙仗簇祥靄日光暎兩載違天尺今看近

九閣

邊敬言

赤羽朝飛急雲峰堠火明鐵山秦帝築銅馬漢下  
兵月黑陰山氣風連暮角聲築壇思拜將誰可作  
長城

經筵

春秋逢二仲聖學重橫經啓沃資前席班聯拱御  
屏鑪香熏日靜晝漏與雲停賜宴來丹地文昌傍  
帝星

推將

禁中思鉅鹿諸將重橫行卻穀敦詩舊穰苴用法  
明功勳期鐵券方略望金城鵲印人爭羨誰邀麟  
閣名

中府宴武進士首揆主席

明時新寵武科甲耀同朝賜宴雲霄迥承恩雨露  
饒首揆聯鷺集庶家響鸞鑣既醉登歌後凌煙望  
爾標

歸舟津門夜緯

城郭連三輔歸途傍海津烟波秋漲艇星月夜行人別闕迎南斗懷息望北辰蒼茫無限思魚鳥獨相親

滄州沽酒

南皮稱勝地滄酒復陶真月下青帘夜風前白墮春自寬頻獨酌求醉反勞神杯影乾坤狹悠悠何處論

臨清

漳河歸碣石鑿空達漕舟萬櫓連帆度孤城遠鬱流雨餘青嶂夕天澹碧雲秋小艇徐牽易風波不爾留

濟寧至揚州千里無岸

野漲爲連霖村莊散濕陰河公排瓠子水母嚙桑林帆影空中掛堤形鏡底沉扁舟無岸泊依傍樹頭禽

朝發丹徒

北來南悵望吳楚舊朱方迥岸風帆落平堤錦纜長獻俘擒漢漚鑿地起隋煬江水吞流急飛舟一

葦杭

晚泊閶門

楓橋纜渡月虎阜復棲雲  
檣影連烏徙鐘聲帶鴈  
聞春秋遺事盡吳越  
隔江分剩有遊仙舫  
歌吹尚紛紛

鄔子驛阻風過章氏飲

家村平望近飛帆  
阻石尤湖隨新漲闊  
酒向故人留鷄黍  
鄉風古魚羹水國秋  
驛樓今夜夢沉醉  
詠仙遊

焚黃

崇禎二年以登極覃恩贈祖父侍郎妣皆淑人焚黃以巳巳過里行矣五年以冊立東宮贈祖父南京刑部尚書妣皆大人至癸酉秋以霖兒舉同上丘也

啓佑懷先德  
馳榮世澤綿  
璽書光日月  
花誥動雲烟  
錫類繇蒼震  
摘詞自木天  
顧瞻松栢下  
餘慕切梧椽

其二

留滯風塵外  
疎濶上丘林  
綸綍龍爲篆  
聲聞鶴和陰  
道因忠厚積  
恩遇聖明深  
徙倚思圖報  
君親兩繫心

以上華日樓言章草

送黃又生中丞撫吳

海國南邊盡朝陽東路行幢旄搖旭氣鼓角動春  
聲越絕隣封近吳歌倚棹輕最憐財賦地羣吏待  
提衡

其二

建節姑蘇郡長江萬里澄風煙開鐵甕雨露到金  
陵海色分帆影山光拭劍稜東南天半壁賀得漢  
中丞

王修之司理見訪

君是維揚雋高才過歷多風雲臨海國雨露沛江  
河驥足元超逸羔裘更委佗衡門蒙枉賁披對意  
如何

其二

詩興君能發文名衆所聽飄搖官轉遂拓落酒初  
醒氣韻雲流月風裁刃發劘莫嗟逢世拙吾道自  
亭亭

胡慎三司理見訪

文章魁土國，筐斗道爲尊。  
造士勤分席，亭疑照覆盆。  
春風馴乳雉，夜月息啼猿。  
公事還多暇，時來訪葦門。

龍華塔院

野閣江天豁，乘風一葦杭。  
水門標鴈塔，貝闕起龍堂。  
艇泊漁竿影，厨燒竹葉香。  
皈依禪定後，章貢望茫茫。

其二

密竹青無地，平沙綠有江。  
佛花低雨檻，覺樹隱秋窗。  
風急舟行亂，天空鳥過雙。  
法心無住着，應把毒龍降。

西山

便登城上閣，青山檻外斜。  
氣蒸彭澤雨，峰掛岳陽霞。  
天寶神人洞，洪崖大隱家。  
一泓章水隔，步障擁龍沙。

題車雲而剩此軒

物情嫌好盡，天道喜留餘。  
屋僅侏儒柱，門多長者車。  
炊煙塵餽飯，暎雪朗床書。  
普眼觀平等，誰人得

廣居

以上英石館調風草

五言律 四

壬午夏起祭贊南樞特旨差官敦趨履任

尚書紫綬印十載與天違  
劍履欽蒙眷丘林敢杜  
機禹貢多南服周邦重舊畿  
廟謀期急使六月戒  
征旂

戒途別親友宿油崗先君丙舍

南昌亭子下冠蓋裊行暉  
草色連江遠鶯聲入夏  
稀乾坤紛帶甲星月肅征衣  
夜及松廬憇豐碑重  
拜道

繇進賢之東鄉

邑屋鍾陵外筠松夾路青  
鳥棲鄉樹隱天淵暮雲  
停吳楚曼羣盜東南候將星  
臨岐無限思惟取素  
心銘

飯草坪驛苦熱

楚越一峯合天分江海情  
縣城三舍遠草市數家  
坪脯簞慙荒飽茶瓜快解醒  
望風疎竹泉不覺有

啼鶯

武林至姑蘇

江旭起潮頭平空野色浮  
元戎傳小隊孤館候鳴鷗  
秀水溪人語胥門戰氣收  
十年經此地彌望意悠悠

姑蘇至丹陽

天入長洲苑延陵帶具區  
海雲遮兩越江月度三吳  
驛舫排幫泊關樓人望孤  
故人無可問煙草自模糊

丹陽晤賀中冷尚書隨從句曲之金陵

鏡湖逢賀監把袂儘移陰  
莫言平陂句徒見別離心  
牽率從浮事遲迴謝所欽  
遙遙句曲路茅洞幾層深

江操

王氣金陵舊長江天擊舂浮船風下瀨掛蓆月搖空  
舞起蓮花劍飛穿楊葉  
爲煩南顧重夙夜詰戎功

其二



入幕皆英選澄清意氣雄將飛蛇鳥陣兵麗鶴鷺  
風牛渚溫嶠戰新亭謝傳功四郊多壘日所志在  
形弓

同魏國徐六岳南和方心察暨內殿科道諸  
公大教場會閣

大將英威下旌門練小戎星芒光受律月滿像彎  
弓鼎足三司貴簪纓五等崇烏臺連畫省麟閣佇  
奇功

其二

留都徵選盛牙幕迴生風廟略看黃石戎裝耀彩  
虹夏卿師李法漢將紀軍功未雨謀桑土雲臺此  
日同

同魏國南和遊牛首

瑤宮仙嶽迥雙闕峙江濤命駕延玄賞牽裾攝翠  
岑龍堂將岫壓鴈塔與雲侵英遊賓侶盛對景共  
豪吟

同前人遊棲霞

正是炎天永相携野逕幽村花沿澗落渚柳傍林

稠古佛鐫山列名僧捨宅晉彩霞棲泊處今日醉  
公侯

乙酉立春

龍躔新改曆羲馭宿天龜夜雨兼雷奮朝雲罨雪  
痕浦浮芳草茁池漾碧波浚詩興隨春動還須把  
酒論

其二

太皞輪規日東皇正首春坤維開壽域斗柄轉洪  
鈞柏葉杯傳蒲椒花頌擬新應圖多逸駿吾老席

吾珍

王閣老鎮蜀

諱應熊

西川資作鎮黃閣舊名臣爲救鄉鄰闕而緩水火  
民江流連見楚棧道綴咸秦應叱王尊馭猿聲日  
夜親

其二

全才兼將相出入寄安危夜作刀州夢朝題劍閣  
詞還家安梓里許國序瀘夷望繫蒼生久難教來  
去遲

范中丞撫黔

諱鏞

巴黔如繡錯繇來古夜郎槃弧元狗國邛笮近羊  
腸未率苗民服兼鄰蜀寇張相如今建節鱗介襲  
衣裳

其二

魏尚雲中守北邊曾借才此方頗俶擾之子忍徘徊  
忠信行蠻貊風霜闕草萊臨江將去鷁回首望

三台

見雪

瑞雲浮野濶春雪滿江關樹裏棲禽寂池邊弱草  
孱酒斟鸚鵡綠山看鷓鴣斑爲羨繁臺賦題詩取

次刪

劉臧方泌監軍故給事劉夢胥仲也

故人不可問爲政卓吳東忽爾見之子依稀對乃  
公毛分丹鳳日翼舉大鵬風應敵兵初震期君第  
一功

其二

亨屯何日策保障賴干城棄繻寧殊智先鞭可抗

衡荆雲隨曉角黔月炤宵鉦把袂堪投分悲歌氣  
未平

送朱蔚園考選

君是劉中壘宗臣自棟梁春秋明禍福洪範數陰  
陽眼望君門近心憂國事長倩言詢適軸徐孺老  
南昌

其二

大雅悲廖廓忠懷爾獨醒文章開一代氣象冠二  
靈久次頭全白相看眼倍青應慙投漢閣獨奮哭

秦廷

東臯

夙昔抱微尚白雲隴上垂平安恒問竹澹泊只嘗  
薺飽看經兼史閒題畫裏詩于茲無善策奚以出  
山爲

其二

四方多難日吾自愛吾廬菜圃通圭甸筠樓貯史  
書淵明憎對客廣德保懸車江上春風起垂竿釣  
鰕魚

京山

城衢南郭內形勝表京山地聳人煙合池寬樹影  
環荷香秋馥郁鳥語晝縉蠻上客時來訪輪蹄幾  
度閒

其二

壯年新卜宅偶爾問花津圃築書連屋堂開德有  
隣景山青旭旦臨水綠塘春十畝閒閒者康衢擊  
壤人

以上延暉草

